

嘉業堂
金石叢書

邠州石室錄

第一冊



卷之六

六

邠州石室錄

吳郁生署檢



邠州石室录 二一函册

编著：叶 昌 炽

出版：文物出版社

北京五四大街29号

印刷：韩营大队装订厂

北京大兴县

发行：北京发行所

一九八二年七月木板刷印

定价：二十元

统一书号：7068·902

劉	乙
氏	卯
嘉	秋
業	八
堂	月
校	吳
刊	興

自序

邠州古新平郡與涇接壤距城西二十里有大佛寺即唐之慶壽寺也石室纍纍皆唐宋元人題刻同治間吾鄉吳憲齋中丞視學西陲劫後有隴輶自許仙屏河帥始中丞時關隴尚未分闡橫舍三年校士兩省僅一使者例以一年駐蘭州邠為通道行李往來皆憩息於此中丞既以試事不遑啟處行囊又未攜氈蠟摩挲古刻望羊興歎但擇其字之清朗者手錄之顧以巖竇窈冥苔封塵積什不能得其二三其後十有餘年至光緒丁亥昌熾以游幕寓羊城中丞亦自甯古塔移節而南出篋中舊藁鄭重相授紙敝墨渝又多謠奪歲月姓字蓋闕如也無從攷

釋而罷其後又五年昌熾始通籍在詞館同列先後出甘輶貽書求物色僉云邠州為陝畺鄰封安得而越俎又十餘年歲在壬寅昌熾始被

命度隴既至邠出西郭逶迤循涇水十里為水簾洞又十里即此剎登閣瞻禮是日驛程在亭口尖宿於長武縣城悠悠山川前行尚遠周覽未畢而僕夫已催發矣不得已謀諸寺僧但唯唯又四年屆兩瓜期歲科按部三至涇而寺僧始以拓本來越高原二百里重趼打包不讐宿諾游方之外吾見亦罕即畀以二十四金未償其勞也今歸里又將十年所始出藏本著錄共得唐二十二通宋六十四通金一通元十六通都百有三通排

續釐訂又一年而脫藁歲月不居嶺海舊游回溯將踰三十載
寤寐思服親至索靖碑下僅而得之既迻錄之又審釋之蓋如
是其博且久也惜中丞墓艸已宿不及商榷俯仰黃墟喟焉太
息其中如王堯臣蔡延慶李丕旦諸刻皆於無文字處鉤稽而
出不可謂非愚者之一得然宋自政宣而後遼亡金警西事已
鞭長莫及柱下藏書語焉弗詳偶獲孤證亦有杞宋無徵之歎
宋人題字大都皆其郡大夫及從游幕僚插架又無邠州志課
虛責有非闕則譌舉燭為隱貽譏方雅徒以用力既勤敝帚自
享日月逝矣邁征未已垂暮餘年尚思刊其野言補而正之世
有韻而好古如歐陽公不以管蒯見棄筆鏤藍縷願為前馬歲

在元默困敦十月二十五日緣製自書於奇觚廬

邠州石室錄序

金石簿錄歐趙尚矣乾嘉以後作者如林平津一錄囊括絃宇

畢

關中山左

兩浙 阮翁

粵東 謝西諸家皆以一行省爲區域下至一郡

一邑南如江甯北如常山中原如安陽偃師亦皆有專書與地志相表裏然余所見無如長汀之蒼玉洞一卷之石其爲地也幾何而劉燕庭方伯獨輯而錄之好寫精雕一如其所簞三巴晉古志之例吾鄉姚彥侍方伯有石魚題名攷所謂石魚者亦夔巫江中一石耳惜方伯歸道山後雲煙散落其書佚不傳長洲葉鞠常先生比年避地海濱過從論學知其奉使隴皋時過邠州游大佛寺得唐宋石刻百餘通歸田後手摹其文字又繫

以攷釋成邠州石室錄三卷邠州爲古新平郡其地當關隴之
交緡車輶傳往來不絕朝發郡城夕宿長武而此利適爲中頓
士大夫登臨流覽視若無睹而先生獨能於倥傯于役之交盡
發其寶藏知世閒文字顯晦固有其時尤必待其人而後出也
顧先生歆然不自足嘗告余曰隴右唐宋以後淪於戎索惟環
慶涇原諸郡爲邊帥駐兵之地建炎南渡階成秦鳳尚未折而
入於金此兩地閒有宋刻又聞崆峒之軒轅宮及秦之麥積巖
摩厓林立以非簡書所經之地未能規往氎椎物色寂寥無幾
又咨嗟而言曰最可惜者莫如敦煌之莫高窟也敦煌距嘉峪
關外四百里爲安西州屬學使者行部西不越肅州但於安西

士子詣肅就試者輒加咨訪皆言窟在千佛山數年前巖扉崩陷一石室豁然洞開中有石榻皮畫象經卷甚多僅從汪栗庵太令及同年某校官得唐宋石刻畫象寫經五六卷其餘不知所歸矣關外人文樸僊無能任摭訪之役悵快而返比使旋甫解裝即聞第二洞又啟驚人祕笈積薪居上何啻什伯皆爲外人橐載而去海上所印敦煌石室錄閱之令人增歎惜使車之未出關也先生之言如此余曰是則然矣然則邠州諸刻幸不終閤又幸而得著於錄其可祕枕自翫哉因爲寫梓以詒同好更以拓本參校無年月中尚有檀峪王鴻業蜀范文光兩通書法皆精整而此錄未收滋以爲疑先生曰邠州姜嫄公劉廟碑

後有崇禎六年川西范文光謁廟題字而王鴻業結銜爲陝西
軍政都指揮前游□將軍亦不類宋元戎秩皆明刻也故從闕
如其矜慎又如此乙卯立秋後三日吳興劉承幹識

游邠州大佛寺記

邠涇之閒高原截業右隴左秦巖壘鎖鑰嗚咽溝水出巨峽而
彈箏頰洞邊塵挾流沙而入甕僕以壬寅初夏弭節西邁自渭
爲梁于豳斯館津吏馬首山川能說壘錯犬牙井邑相望巍然
高閣鬱觚棱而特起者古之慶壽寺也布金在地出自東陵故
侯鑿石爲軀踰於西域真象一佛二尊者俠侍其高八丈五尺
一體一堪一堪一級自頂至踵浮屠五成承雷中空若穿屋漏
衛以欄楯俯闕井榦雙林趺坐忽聞獅子吼聲兩廡翼張有如
鳥數飛狀其地前臨達市後倚巉巖厓竇豁開豁岒壁立導者
告余曰此皆僧寮也蓋以一布肘地因山起刹海衆雲集無以

安禪鑿坏而遁本陶穴之古風拾級可登有槽巢之遺製石膚
欲雨森若砭肌徑髮如雲劣僅容趾安石牀而挂錫密若蜂棲
攀鐵絙以爲梯捷於猱附始知一粒粟中果有世界但容蒲團
即能說法貌茲藕孔亦可藏身周覽石室黝無日光四壁題名
閒以造象當畫秉炬捫苔蘚而讀之般若梵文斷自金輪之歲
與可題字證諸玉局之詩唐宋以來千有餘禩歐趙諸家迄未
著錄良以邊郡僻左椎搨旣尠巖洞窈深可蔽風雨寶藏未洩
石壽能延惜乎志乘無稽簡書可畏宗門談帚但憑老衲臨風
書苑謨觴難比右軍快雪於是登高遐矚喟然舒歎陟則在巘
述者如川其川涇汭攷職方之古訓自土沮漆遡公劉之始基

廣武高原亦曰宜祿萬店後臨蕭關前控崔嵬如削塞九泥而
可封栲栳爲圈引車輪而欲轉昔唐太宗破薛舉於淺水原即
其地也荒煙斷甃廢壘猶存落日哀笳礪樓尚峙此一界相即
古戰場後有來者視爲傳舍偉哉金仙氏之教也夫以鄂公材
武遭際英主嘆喏宿將旣兵符之在握馳驅暮年猶橫槊以爲
雄而乃解弢息機皈心淨土藍田罷獵是故將軍紺宇檀施爲
功德主招提奉佛近依黃竹爲鄰導引游仙託言赤松招我豈
惟迴嚮是真見幾至於涇原諸帥籌筆臨邊華州兩生棄繻出
塞籠紗在壁曾聽飯後鐘聲捧硯登樓更俟童隅燭跋酒酣以
後墨瀋橫飛年月姓名大書深刻即今三垂晏然剝竿不墜有

客信宿載石癖而俱來我佛慈悲屹金身而不壞其西一室埽
地爲壇如馬鳴王別開道場一雞飛地等於鄰比大巫小巫爲
喻識者哂之一佛千佛同歸適焉至此望川涂其尚悠揖山靈
而言別黑水湯湯方舟而濟苒鞠旣即亭口中頓憑軾抽毫書
付小史時維光緒二十八年四月十有四日也